



Proba de

Código

CMPS002

Lingua galega

Parte sociolingüística. Lingua galega



1. Formato da proba

Formato

- A proba consta de vinte cuestións tipo test.
- As cuestións tipo test teñen tres posibles respostas das que soamente unha é correcta.

Puntuación

- Puntuación: 0'50 puntos por cuestión tipo test correctamente contestada.
- Cada cuestión tipo test incorrecta restará 0'125 puntos.
- As respostas en branco non descontarán puntuación.

Duración

- Este exercicio terá unha duración máxima de: 40 minutos.

Materiais e instrumentos que se poden empregar durante a proba

- Bolígrafo con tinta negra ou azul.



2. Exercicio

Texto 1

COMBUSTÍBEIS FÓSILES

Mercedes estuda abandonar o petróleo en 2015

Xa está a investigar para fabricar coches que funcionen con biocombustíbeis, electricidade ou baterías de fuel.

A compañía automobilística alemá Mercedes-Benz ten previsto abandonar os vehículos propulsados por derivados do petróleo en menos de 7 anos, en 2015. Por iso está xa a investigar fontes de enerxía alternativas, como a enerxía eléctrica, a célula de combustíbel ou o biodiésel. De feito, xa se presentaron algúns modelos nas súas instalacións. Segundo a información publicada por Yahoo EcoGeek, no ano 2010 podería saír á venda un primeiro vehículo que funcione con biocombustíbeis. O seguinte paso será o lanzamento dun coche eléctrico da marca Smart libre de emisións contaminantes. A empresa xa está a probar en Londres 100 deses vehículos. Mercedes está a investir case 4 millóns de dólares no seu plan de mobilidade sustentábel, e outros 1.400 de aquí a 2014. Aínda que é posíbel fabricar vehículos que poidan usar outros combustíbeis distintos da gasolina e do gasóleo, o reto é facer coches que poidan circular sen ningún tipo de fuel de orixe fósil.

[<http://www.vieiros.com>]

1. O tema principal da noticia é:

- A** A compañía Mercedes-Benz ten previsto fabricar coches propulsados por enerxías derivadas do petróleo.
- B** A compañía Mercedes-Benz ten previsto fabricar coches propulsados por enerxías derivadas de combustíbeis de orixe fósil.
- C** A compañía Mercedes-Benz ten previsto fabricar coches propulsados por enerxías non derivadas do petróleo.

2. No corpo da noticia, a palabra *emisión* significa:

- A** Tempo durante o cal emite ininterrompidamente unha emisora.
- B** Acción e efecto de botar fóra de si unha cousa.
- C** Conxunto de títulos, efectos ou valores.



3. No corpo da noticia, a palabra *investir* significa:

- A Producir materiais de consumo sustentable.
- B Conferir unha dignidade ou un cargo.
- C Empregar cartos nunha empresa para conseguir beneficios.

4. Cal é a serie de palabras correcta?

- A Biodiésel, inverno, bágoas, revelar.
- B Obella, benvida, veirarrúa, rebelar.
- C Mobido, avella, parabéns, imbentar.

5. Cal é a serie de palabras correcta?

- A Vehículo, abía, hinflar, abano.
- B Horquídea, hedra, iena, hovo.
- C Ermida, inflar, coherencia, inchar.

**Texto 2**

Adeus ás fronteiras universitarias

A polémica rexurdiu na universidade compostelá. O número de prazas solicitadas polos alumnos estranxeiros, concretamente por estudantes lusos, para o vindeiro curso 2007-2008 na Facultade de Medicina, suscitou a incomodidade dos estudantes galegos que viron como as prazas eran cubertas por foráneos a pesar de superar a nota de corte establecida. Dende este ano todos os estudantes membros de países da Unión Europea poderán acceder ao sistema universitario galego sen ter que superar a proba de selectividade, que ata o momento era obrigatoria para todo aquel que quería cursar unha carreira. O Proceso de Bolonia, que dende 1999 traballa para crear un Espazo Europeo de Educación Superior, posibilita que a partir deste curso os alumnos da Unión Europea non teñan que someterse ás probas de acceso de cada país, senón que se establecen unhas táboas de equivalencias entre os sistemas educativos dos distintos países e no caso de que se trate dunha carreira con límite de prazas, os estudantes serán seleccionados por nota, indistintamente da súa procedencia. Este novo procedemento xunto coa escasa oferta de centros de Medicina existente en Portugal, seis en todo o país, aumentou a demanda dos mozos lusos para cursar aquí esta titulación. O número de preinscricións pasou das 279 do curso pasado a 308 este ano, das cales 43 foron admitidas, o que suporía en caso de que todos formalicen a matrícula un 15% dos alumnos de primeiro curso. Esta situación suscitou duras críticas por parte dos estudantes galegos, ao considerar que lles estaban quitando unhas prazas que lles pertencían, pedindo a realización dunha proba de idioma aos estranxeiros que soliciten a entrada e que limiten o número de prazas destinadas aos foráneos. Pero como sinala Senén Barro, reitor da Universidade de Santiago de Compostela, isto non significa que finalmente todos vaian cursar a titulación en Santiago, xa que no ano 2006 de todos os preinscritos só se matricularon catorce.

[<http://www.anosaterra.com>]. Venres, 10 de agosto de 2007

6. Segundo a noticia, o número de preinscricións de alumnos estranxeiros para estudar Medicina:

- A** Foi maior no ano 2006.
- B** Incrementouse no ano 2007.
- C** Non variou respecto do ano 2006.

7. Desde o ano 2007 os estudantes da Unión Europea:

- A** Poden acceder ás nosas universidades sen teren que realizar ningunha proba.
- B** Teñen que realizar unha proba de idiomas para poderen acceder ás universidades.
- C** Poden ocupar como máximo o 15 % das prazas reservadas a estranxeiros.



8. O Proceso de Bolonia:

- A** Permite que os alumnos estuden en calquera país europeo só nun reducido número de circunstancias.
- B** Está a implantar a libre circulación de alumnos e un espazo común para a educación superior na Unión Europea.
- C** Establece que os reitores decidan sobre a admisión de alumnos estranxeiros nas nosas universidades.

9. No corpo da noticia, a palabra *polémica* significa:

- A** Acontecemento que segue ou resulta doutro.
- B** Rifa, discusión ou controversia sobre un asunto.
- C** Falta de mérito para merecer algo.

10. Cal é a serie de verbos correctamente conxugada?

- A** Poidamos, posuíu, soubesen, produzades.
- B** Rexurdiu, poidese, facería, minten.
- C** Trocabades, sirveu, encubren, prosiguía.



Texto 3

Velocidade excesiva

O condutor do microbús sinistrado o domingo circulaba a 105 km/h nunha zona cuxo límite é de 40. Enfróntase a unha posible acusación de homicidio imprudente.

A análise do tacógrafo do microbús sinistrado onte en Santiago revela que o vehículo circulaba a unha velocidade de 105 quilómetros por hora nunha zona na que o máximo permitido descende ata os 40, segundo informaron fontes da Garda Civil, que apuntan ao feito de que "varias" das ocupantes do microbús que transportaba ao equipo feminino de voleibol Emevé de Lugo "non levaban posto o cinto de seguridade" como unha das causas do falecemento de dúas das mozas. Como consecuencia do exceso de velocidade, a Benemérita instruirá dilixencias pola suposta comisión de senllos delitos de homicidio por imprudencia ao condutor, que só sufriu rabuñadas. A Garda Civil apunta tamén a un despiste, dado que, ao parecer, pasou o primeiro desvío que debía tomar para ir ao seu destino.

O accidente tivo lugar este domingo sobre as 12.00 horas nas inmediacións do aeroporto compostelán de Lavacolla, onde un microbús saíu da vía, chocou contra o muro lateral dunha rotonda e envorcou posteriormente. A primeira das vítimas mortais faleceu no acto, mentres que a outra finou na Unidade de Coidados Intensivos do Hospital Clínico de Santiago (CHUS).

Pediulles que puxeran o cinto de seguridade

Con todo, fontes da Benemérita tamén remarcaron que o falecemento das dúas mozas podería terse "evitado" se levasen abrochado o cinto de seguridade como lles pediu o chofer do minibús, segundo apuntaron algunhas das xogadoras do equipo de voleibol lucense que lograron saír con vida.

A empresa de transporte de viaxeiros, que polo momento asegura non recibir ningunha notificación oficial sobre as supostas causas do suceso, remarcou que o condutor era un "profesional experimentado". Así, incidiron en que durante a súa traxectoria na empresa "nunca" sufrira un contratempo ao volante dun autobús. "Impactados" aínda pola traxedia, a empresa asegurou que, polo momento, non se expuxo tomar cartas no asunto.

[<http://www.galicia-hoxe.com>]

11. Segundo a noticia, o accidente mortal produciuse porque:

- A** O condutor carecía de experiencia suficiente para conducir o minibús.
- B** O condutor non comunicou ás viaxeiras que abrochasen o cinto de seguridade.
- C** O condutor despistouse e ía a unha velocidade moi superior á permitida no tramo.



12. Un *tacógrafo* é:

- A Un aparello que analiza avarías nos vehículos de transporte.
- B Un instrumento que rexistra datos nos vehículos de transporte.
- C Un limitador de velocidade nos vehículos de transporte.

13. Na palabra *microbús* o elemento de composición de palabras *micro-* significa:

- A Pequeno.
- B Grande.
- C Estreito.

14. No corpo da noticia a palabra *senllos* significa:

- A Un para cada cal.
- B De grande entidade ou importancia.
- C De pouca importancia e consideración.

15. No corpo da noticia a palabra *instruír* significa:

- A Facer que alguén adquira os coñecementos necesarios no ensino.
- B Deter ou poñer presa a unha persoa acusada.
- C Formalizar un proceso, caso ou expediente.

16. As formas verbais *tivo*, *chocou* e *faleceu* son:

- A Pretérito imperfecto de subjuntivo.
- B Pretérito perfecto de indicativo.
- C Pretérito pluscuamperfecto de indicativo.

17. Cal é a serie que contén só palabras de xénero feminino?

- A Síndrome, ponte, suor, arte, dor, auga.
- B Análise, dor, sal, mel, fel, til.
- C Viruxe, cal, sangue, dote, nada, sinal.

18. Cal é a serie de palabras correcta?

- A Veterán-veterá, musulmán-musulmana, león-leona.
- B Compostelán-compostelá, italiano-italiana, san-sa.
- C Arousán-arousana, humán-humana, afgán-afgana.



19. Cal é a oración correctamente escrita?

- A** O correo electrónico enviámolo desde o meu computador.
- B** O correo electrónico o enviamos desde o meu computador.
- C** O correo electrónico enviámolo desde meu computador.

20. Cal é a serie de palabras correcta?

- A** Sedutor, doctrina, atrativo, inflacción.
- B** Redutor, selección, diretriz, estrutura.
- C** Conductor, suxeito, doutor, lácteo.



Folla de respostas

Respostas				
Nº	A	B	C	
1			X	
2		X		
3			X	
4	X			
5			X	
6		X		
7	X			
8		X		
9		X		
10	X			
11			X	
12		X		
13	X			
14	X			
15			X	
16		XX		
17	X			
18		X		
19	X			
20			X	
Nº de respostas correctas (C)				
Nº de respostas incorrectas (Z)				
Puntuación total = C x 0'5 – Z x 0'125				

Nas preguntas de test, por cada resposta incorrecta descontaranse 0'125 puntos. As respostas en branco non descontarán puntuación.